

Канон преподобному Макарию Калязинскому

Память празднуем 17 (30) марта, 26 мая (8 июня)

Тропарь, глас 8-й

Плотская мудрования, отче Макарие, воздержанием и бдением умертвил еси, место бо, на немже поты твои излил еси, яко труба, вопиет к Богу, повѣдаючи твои исправления, и по смерти честныя твои мощи источают исцеления. Темже вопием ти: моли Христа Бога, да спасет души наша.

КАНОН, глас 8-й

Песнь 1

Ирмос: Воду прошед, яко сушу, и египетскаго зла избежав, израильтянин вопиаше: Избавителю и Богу нашему поим.

Припев: Преподобне отче наш Макарие, моли Бога о нас.

Отверзи ми, Христе, устне воспети подвиги угодника Твоего, преподобнаго Макария, да молитвами своими облак разорит неведения моего.

Преподобне отче наш Макарие, моли Бога о нас.

Блаженное житие на земли пожив, преподобне, Небесное наслаждение достигл еси и ныне со Ангелы ликуеши.

Слава: Память твою, Макарие преподобне, яко пресветлое солнце, возсия, в нюже нам испроси от Бога благодать и милость и согрешений избавление.

И ныне: Благословен Плод, Пречистая, чрева Твоего, Имже земнии вси клятвы избавихомся, Благословенная Всечистая, несказанное чудо, неведомое слышание, всех же верных спасение.

Песнь 3

Ирмос: Ты еси утверждение притекающих к Тебе, Господи, Ты еси Свет омраченных, и поет Тя дух мой.

Преподобне отче наш Макарие, моли Бога о нас.

Крепкою твоею молитвою, отче, возшел еси к премирному наслаждению и от честныя раки чудес сияния испущаеши, Макарие.

Преподобне отче наш Макарие, моли Бога о нас.

В Божественней памяти твоей днесь сошедшеся, воспеваем твои подвиги, и болезни, и исправления, отче преподобне.

Слава: Чудно житие твое явися, преподобне, благодатию Божественнаго Духа обложен, блаженную кончину приял еси, отче, радуясь.

И ныне: От ложесн Твоих, Пречистая, правды Солнце возсия и мир просвети, Егоже Божественными зарями и мене просвети.

Господи, помилуй (трижды).

Седален, глас 8-й

Хранитель сый Божественных повелений Владыки, славне, чистое житие твое показало ты священнодателя Божественна, каплями потов твоих прелести лютое углие погасил еси и в тихое пристанище достигл еси, зриши, блаженне, Егоже возжелел еси. Темже вопием ти: моли Христа Бога грехов оставление подати чтущим любовию святыю память твою.

Слава, и ныне: Яко Деву и едину в женах, Тя, без семени рождшую Бога плотию, вси ублажаем, роди человечести, Огнь бо вселся в Тя Божества, и яко Младенца дойши Зиждителя и Господа. Тем, Ангельский и человеческий род, достойно славим пресвятое Рождество Твое и согласно вопием Ти: моли Христа Бога согрешений оставление даровати поклоняющимся верою пресвятому Рождеству Твоему.

Песнь 4

Ирмос: Услышах, Господи, смотрения Твоего таинство, разумех дела Твоя и прославих Твое Божество.

Преподобне отче наш Макарие, моли Бога о нас.

В простоте души, яко Ангел, пожив, блаженне, страстей разгнал еси душегленную прелесть Божественною благодатию.

Преподобне отче наш Макарие, моли Бога о нас.

Честен сосуд явился еси Божественнаго Духа, нося в сердца твоем, блаженне, Божественныя ароматы, услаждая сердца верно память твою почитающих.

Слава: Пресветлым венцем обложен, предстоиши Престолу всех Царя: молися, преблаженне, с верою празднующих Божественную память твою.

И ныне: Законы в Тебе испразднишася естества, паче естества бо Слово родила еси. Темже Тя верою молю: паче естества человека, Всенепорочная, много согрешша и Бога удалшася, обращаеши, спаси мя молитвами Твоими.

Песнь 5

Ирмос: Утренююще, вопием Ти: Господи, спаси ны, Ты бо еси Бог наш, разве Тебе, иного не вемы.

Преподобне отче наш Макарие, моли Бога о нас.

Егда благодатию Духа смиренную стяжал еси мудрость, раждающему смерть врагу глубокую язву дал еси и высокоумный того нрав до конца низложил еси.

Преподобне отче наш Макарие, моли Бога о нас.

Возшед ко обителем вечным, лику преподобных причтлся еси, Макарие, с нимиже нас поминай, на земли тебе поминающих.

Слава: Да ублажится достойно Макарий: пощением бо, и молитвами, и слезами Богу соединиши и вся просвещает духовною благодатию.

И ныне: О Мати Деве Отроковице, яже необыменнаго Бога плотию рождая, Ангелов слава и демонов язва, Богоневесто, мое сердце, уязвившееся грехом, цельбы Божественныя сподоби.

Песнь 6

Ирмос: Молитву пролию ко Господу и Тому возведу печали моя, яко зол душа моя исполнися и живот мой аду приближися, и молюся, яко Иона: от тли, Боже, возведи мя.

Преподобне отче наш Макарие, моли Бога о нас.

На земли добре пожил еси, преподобне, и святых светлости, и вечных наслаждений блаженство видети сподобился еси.

Преподобне отче наш Макарие, моли Бога о нас.

Честна смерть явися блаженного Макария пред Тобою, Боже всяческих, егоже память почитающим врачество безмездно явил еси.

Слава: Духа благодать приял еси, отче, недуги от человек прогнати и вред демонский истребляти, великий угодник показался Христа Бога нашего.

И ныне: Найде на Тя Вседетельный Дух, Всенепорочная, и Слово Божие в Тя вселися, и плоть бысть несказанно, пребыв неизменен.

Господи, помилуй (трижды). Слава, и ныне:

Кондак, глас 2-й

Вышних желая, воздержанием, и труды, и поты насладився, желание плоти твоея обуздав, чудес дар прием от Христа Бога, светильник явился еси пресветлый. Темже Христова Церковь песнями славит тя, преподобне Макарие, отче наш.

Икос

Ангел земный и человек Небесный, просиял еси в воздержании всяцем молитвою, и постом, и чистотою и, Божественное течение скончав, Вышняго нетления причастник был еси, Богоносе, дерзновение стяжав к Человеколюбцу Богу, Иже исцелений благодать на недуги различныя тебе дарова. Темже ти верою вопием: радуйся, всеблаженне отче, постников похвало; радуйся целомудрия столпе, имже демонския шатания искоренишася; радуйся, светильниче многосветлый, иже чудес сиянии вселенную просвещаеши; радуйся, яко стаду твоему подаваеши помощь и заступление; радуйся, крестonosному народу нашему похвала и утверждение, егоже соблюди молитвами твоими от враг ненаветна, да вси вопием ти: радуйся, преподобне Макарие, отче наш.

Песнь 7

Ирмос: Божия низхождения огонь устыдеса в Вавилоне иногда. Сего ради отроцы в пещи, радованною ногою, яко во цветнице, ликующе, пояху: благословен еси, Боже отец наших.

Преподобне отче наш Макарие, моли Бога о нас.

К Свету Незаходиму возшед и, яко солнце, просвещаеши вселенную, Света бо дела совершил еси, Макарие преподобне, и ныне вопиеши: отец наших Боже, благословен еси.

Преподобне отче наш Макарие, моли Бога о нас.

Плотская движения, преподобне, воздержанием и на земли леганием умертвил еси

и добродетелей просвещением просиял еси, вопия Христу: отец наших Боже, благословен еси.

Слава: Чудно житие твое, преподобне, явися, благодатию Божественного Духа обложен, блаженную кончину приял еси, о Христе радуясь, к Немуже и зывал еси: отец наших Боже, благословен еси.

И ныне: Ныне вся исполнишася Света Божественного Тобою, Пречистая, Ты бо дверь явилася еси, еюже миру Бог прииде, просвещая верою зовущия: отец наших Боже, благословен еси.

Песнь 8

Ирмос: Седмерицею пещь халдейский мучитель Богочестивым неистовно разжже, силою же лучшею спасены, сия виде, Творцу и Избавителю вопияше: отроцы, благословите, священницы, воспойте, людие, возносите во вся веки.

Преподобне отче наш Макарие, моли Бога о нас.

Божественными добротами наслаждаясь, чудес сиянии вся просвещаяши и демонскую тьму разоряяши Божиею благодатию, поя: отроцы, благословите, священницы, воспойте, людие, возносите во вся веки.

Преподобне отче наш Макарие, моли Бога о нас.

Блистаясь благодатию Божественного Духа, преподобне Макарие, честное твое творящим успение светлыми твоими молитвами испроси грехов отпущение, поющим: отроцы, благословите, священницы, воспойте, людие, возносите во вся веки.

Слава: Зарями твердых подвигов твоих, яко солнце, возсиял еси: врачевания источаяши и всяку болезнь облегчаяши Христу вопиющим: отроцы, благословите, священницы, воспойте, людие, возносите во вся веки.

И ныне: Яко разбойник, взываю ти: помяни мя, Человеколюбче. Плачу, яко блудница, и вопию: согреших, яко древле блудный, кающаяся приими мя, отчаянного, Богородицы ради, да усердно вопию: священнии, воспойте, людие, и возносите Христа во веки.

Песнь 9

Ирмос: Ужасеся о сем Небо, и земли удивилася концы, яко Бог явися человеком плотски и чрево Твое бысть пространнейшее Небес. Тем Тя, Богородицу, Ангелов и человек чиновачалия величают.

Преподобне отче наш Макарие, моли Бога о нас.

Рака, идеже лежит честное тело твое, источник содевает чудес, к нейже притекающе, от всякия скверны и страстей избавляемся.

Преподобне отче наш Макарие, моли Бога о нас.

Огнем Божественного страха душу распалил еси, и к сиянию неувечернему востекл еси, и ныне, блаженне, Трисолнечным Светом озаряемь.

Слава: Мирския сладости возненавидев, мужеским нравом к подвигом устремился еси и преподобным красотам лепотна был еси, тем память твою почитаем, досточудне.

И ныне: Низложи вознесенныя и победи полки иноплеменных, Дево Чистая, хотящая бранем, и Твоя рабы неврэдны от них сохрани, Отроковице.